

Իւանի» (արձ. 175): Հովհաննես առաջնորդը հյուրատանն է նվիրել Կոշաձորի այգին և «զՈւնագոմուց» կեսը: Ուրիշ արձանագրություններից ևս երևում է, որ Հյուրատունը վանքից անկախ ունեցել է իր կալվածքները: Այսպես, օրինակ, Սանահնի առաջնորդ ատեր Հովհաննեսը 1222 թվականին Հյուրատանն է նվիրել Աստվածածնա ձորի այգին, ինչպես նաև տներ ու հողեր (արձ. 174), իսկ վարդան քահանան 1275 թվականին գնել է Ատոմի այգին 375 սպիտակի և տվել է դարձյալ հյուրատանը (արձ. 128):

14. Գյուղի աղբյուրը: Բավական մեծ շինություն է և գտնվում է գյուղի արևմտյան կողմում: Աղբյուրի շենքը թիկունքով հենված է սարալանջին, որտեղից ջուր է գալիս քարաշեն գետնուղիով, իսկ ճակատի կողմից աղբյուրի շենքը երկկամար մի սրահ է, որ

կենտրոնից բաժանված է երկու թևի: Սկզբում շենքի ամեն մի թևն ունեցել է իր երկթեք ծածկը, բայց վերջին նորոգության միջոցին ճարտարապետական հուշարձանների պահպանության կոմիտեն ձևը փոխել և երկու թևի համար մի ընդհանուր երկթեք ծածկ է շինել: Այս աղբյուրը կառուցված է հայոց ՉԴ (704+551=1255) թվականին, որի կառուցմանը հարյուր սպիտակ է նվիրել Մխիթար քահանան:

Սրանք են Սանահնի ճարտարապետական գլխավոր կառուցվածքները:

Նլնելով մեր ներկա աշխատության բնույթից, վանքի մյուս շինությունների կառուցման թվականների վրա կանգ չենք առնի, մանավանդ, որ նրանց վրայի բոլոր վիմական արձանագրություններն այստեղ հրատարակում ենք առանց բացատրության:

Գլուխ Բ.

ԳՐՎԱԳՆԵՐ ՍԱՆԱՀՆԻ ՀՆԱԳՈՒՅՆ ՊԱՏՄՈՒԹՅՈՒՆՆԵՑ

Սանահնի վանքի հիմնադիր առաջնորդն եղել է Պոլիկարպոսը: Այդ մասին տեղեկություն է պարունակում իր մեջ 972 թվականին Սանահնում գրված մի ձեռագիր մատյան, որ Բարսեղ Կեսարացու «Յաղագս ճգնաւորաց» գրքի ընդօրինակությունն է:

Նրա հիշատակարանում գրիչը խնդրում է հիշել նաև

«Ձհանգուցեալ սուրբ հայրն մեր առ Քրիստոս Պաղիկարպոս, որ սկիզբն արար վանիցս շինութեան» («Քոթուկ», էջ 39):

Պոլիկարպոսը մեռել է այդ հիշատակարանը գրելուց երկու տարի առաջ, այսինքն 970 թվականին և նրան փոխարինել է «զՆորին փոխանորդ ուխտի առաջնորդս զհայրն Կրիթոս՝ մաքուր յոյժ և ամենայն առաքինի գործաբ լցեալ» («Քոթուկ», էջ 40):

Սակայն, 972 թվականին, երբ արտագրվել է Բարսեղ Կեսարացու հիշյալ ձեռագիրը՝ «Ի նորաշէն վանքս կոչեցեալ Սանահին», այդ ժամանակ վանքի վանահայրը Հովհաննեսն էր, և նրա հրամանով էլ այդ ձեռագիրն ընդօրինակվել է: Նշանակում է, Գրիգորը շատ կարճ ժամանակ է եղել առաջնորդ և կամ, որ ավելի հավանական է, նա

Հովհաննեսի աթոռակիցն է եղել: Այդ եզրակացությունն ենք հանգում այն պատճառով, որ վերոհիշյալ հիշատակարանի մեջ Գրիգորի մահվան մասին ոչ մի խոսք չկա, թեև վանքի առաջնորդ է համարվում նաև Հովհաննեսը:

Հովհաննես վանահայրը, բացի վերոհիշյալ հիշատակարանից, մեզ ծանոթ է նաև Ասողիկի պատմությունից:

Վերջինս, խոսելով Սանահնի և Հաղբատի վանքերի հիմնարկության մասին, ավելացնում է՝

«և առաջնորդ Սանահնի՝ Յովհաննէս գիտնական այրն Աստուծոյ, իսկ Հաղբատայ՝ Սիմէոն ճգնազգեաց ծառայն Քրիստոսի»¹:

Թեև Սանահնում Հովհաննես գիտնականի մասին վիմական արձանագրությունների մեջ ոչ մի տեղեկություն չի պահպանվել, բայց Հաղբատում Սիմեոն վանահոր անունը մնացել է վանքի ամենահին արձանագրությունների մեջ իբրև հիմնադիր՝ Տիրանուն երեցի հետ միասին: Թե ինչու է Հովհաննեսը գիտնական մականունն ունեցել, մեզ ոչինչ հայտնի չի, բայց հավանաբար նա եղել է մի շարք գրքերի հեղինակ, որոնք մեզ չեն հասել:

¹ Ստեփանոսի Տարոնեցույ Ասողկան Պատմութիւն տիեզերական, ր տպ., ՍՊԲ, 1885, էջ 181: